

📅 Selasa, Mac 20 2018

Fokus isu pembangunan rakyat

**Parlimen Jerlun
selesai isu baiki
rumah, bekalan air
dan elektrik**

ROSHILA MURNI ROSLI

JERLUN

Parlimen Jerlun berada dalam daerah Kubang Pasu yang terletak di bahagian utara negeri Kedah.

Keunikan daerah ini adalah kerana ia merupakan kawasan sempadan antarabangsa (Malaysia-Thailand) dan sempadan negeri Perlis.

Memegang status kawasan luar bandar, ekonomi penduduk Jerlun lebih tertumpu kepada sektor perikanan dan juga pertanian.

Parlimen Jerlun yang diterajui oleh Datuk Othman Aziz dari BN merangkap Timbalan Menteri Kewangan II, mempunyai dua Dun iaitu Dun Kota Siputeh dan Dun Ayer Hitam.

Kerusi parlimen ini juga di-ramalkan menjadi idaman parti pembangkang pada PRU14 nanti.

Utamakan pembangunan masyarakat

Sejak 2013, setelah berakhirnya PRU13, Othman telah meletakkan

keutamaan dalam pembangunan masyarakat di Jerlun.

Othman berkata, fokus pertamanya adalah menyelesaikan hal berkaitan pembaikan rumah, bekalan air dan elektrik.

"Alhamdulillah, setakat ini kita berjaya melaksanakan pembaikan rumah tidak kurang 3,000 buah.

"Dari segi bekalan air dan elektrik, 500 rumah disalurkan bekalan baru secara percuma," katanya.

Menurutnya, lebih mengembirakan terdapat juga pemohon yang berjaya mendapat rumah baharu dan baik pulih rumah di bawah peruntukan Kementerian Kemajuan Luar Bandar dan Wilayah (KKLW).

"Dalam pada itu, kawasan Jerlun turut menerima pembangunan Rumah Mesra Rakyat untuk memastikan rakyat Jerlun mendapat kehidupan yang lebih selesa.

"Pada Ogos tahun lalu, Menteri Besar, Datuk Seri Ahmad Bashah Md Hanipah telah merasmikan Majlis Pecah Tanah Projek Perumahan Rakyat (PPR) Ayer Hitam, di sini.

"PPR ini mempunyai 630 unit rumah teres setingkat dan dijangka siap sepenuhnya pada tahun 2019.

"Selain itu, kita juga dihabarkan akan mendapat tambahan 500 unit



Masjid Ar Rahman, Kerpan yang berada dalam Parlimen Jerlun merupakan salah sebuah masjid yang aktif menjalankan aktiviti bersama anak karlah.

PPR di Kota Siputeh," katanya.

Menurutnya, berkaitan infrastruktur, sehingga kini lebih 1,000 tiang lampu jalan telah didirikan bagi menerangi kampung-kampung di dalam Parlimen Jerlun.

"Ini termasuk peruntukkan daripada Lembaga kemajuan Pertanian Muda (Mada) untuk membaiki jalan-jalan ban," katanya.

Pendidikan jadi agenda utama

Sebagai wakil rakyat adalah menjadi tanggungjawabnya untuk melihat kemajuan bidang pendidikan di 19 buah sekolah rendah, tujuh sekolah menengah, dan empat sekolah agama dalam parlimen ini.

Bukan saja untuk melihat kemajuan dan peningkatan prestasi dalam setiap peperiksaan malahan

turut mengatur program untuk pe-nambahbaikan dan sebagainya.

"Kita sentiasa bekerjasama dengan Pejabat Pendidikan Daerah Kubang Pasu untuk memastikan pendidikan di sini sentiasa menunjukkan peningkatan walaupun di kawasan luar bandar.

"Ini sebagai usaha kita untuk melihat sekolah di sini dapat berlari sama pantas dengan sekolah-sekolah lain yang lebih baik," katanya.

Menurutnya, sebuah kolej komuniti juga bakal beroperasi di Kodiang yang akan menempatkan beberapa kursus daripada cawangan Kubang Pasu.

"Kursus yang ditawarkan adalah Sijil Teknologi Senibina (STS) dan pengambilan akan dibuka pada Julai nanti.

"Setakat ini pelajar sedia ada berjumlah 33 orang, dan saya harap lebih banyak institusi pengajian dibuka masa akan datang," katanya.

**P065 PARLIMEN
JERLUN**

● N003 : Kota
Siputeh
● N004 : Ayer Hitam

Tak pinggir Ayer Hitam

Walaupun Adun Ayer Hitam, Datuk Seri Mukhriz Mahathir beralih kepada Bersatu setelah dipecat daripada Umno dua tahun lalu, namun Othman masih menggalas tanggungjawab terus membantu penduduk kawasan Ayer Hitam yang telah memilih BN pada PRU13 yang lalu.

"Kita tidak mahu penduduk di kawasan ini berasa tersisih daripada bantuan BN dan tugas kita membantu rakyat tak kira kawasan mana.

"Ketua Umno Bahagian Jerlun, Datuk Abu Hassan Sharif sentiasa mengambil berat dan mendengar keluhan penduduk di situ. Kita turun padang walaupun wakil rakyatnya sendiri jarang berbuat demikian," katanya.

Menurutnya, beliau yakin rakyat dapat menilai sendiri usaha yang dilakukan oleh pimpinan BN di kawasan itu yang sudah bertindak sehabis baik.

"Rakyat perlu menilai kemampuan seseorang itu bergerak melakukan kerja dan bukannya atas individu pemimpin yang kini beralih kepada parti pembangkang," katanya.